

戚少保年譜耆編

戚少保年譜者編卷之八

閻嗣祚國彙纂

緄嗣昌國集錄

廩嗣報國詳訂

庠嗣興國叅校

隆慶三年己巳家嚴四十二歲

春二月以總理兼鎮守薊州永平山海等處督師十  
二路軍戎事

家嚴先以總理督練四大將兵駐密雲節制與總  
督同乃諸將不奉命視總理猶寓而居無厝宇役

無人徒給無供億無何以上言邊事得失遂改鎮  
守而陰收其權先是邊將腴軍費糞家丁虜至伺  
其飽歸尾而鵬勦拖老羸以爲功咸自爲得計家  
嚴倡練兵之議一時邊將蔑有省者時三屯鎮守  
郭公琥以節制故謀入京於是議者謂太阿之柄  
不假武人乃以一鎮二帥事屬不便議改代郭仍  
以總理銜鎮守後不爲例雖不易銜而練兵之議  
寢矣

請建空臺疏

略云禦戎之策惟戰守二端除戰勝之事別有成

議外以守言之東起山海西止鎮邊地方綿亘二千餘里擺守單薄宜將塞垣稍爲加厚二面皆設垛口計七八十垛之間下穿小門曲突而上又於緩者百步衝者五十步或三十步卽騎牆築一臺如民間看家樓高五丈四而廣十二丈虛中爲三層可駐百夫器械餼糧設備俱足中爲疏戶以居上爲雉堞可以用武虜至卽舉火出臺上瞰虜方面高下而皆以兵當俾其臺之位置視山之形勢參錯委曲務處臺於牆之突收牆於臺之曲突者受敵而戰曲者退步而守所謂以守而無不固者

也以臺數計之每路約三百座薊昌十二路共三千座每臺給銀五十兩通計十五萬兩每歲解發五萬完臺一千三年通畢如此則邊關有磐石之固陛下無北顧之憂矣部覆一千二百座疏上上允其奏

### 募南兵至塞

薊人夙多木彊律以軍政卽不堪家嚴疏請募南中人入穀者一軍以倡勇敢乃遣官往募舊部曲三千人至而待命於郊自朝雨甚至日中軍容益肅邊將大駭曰將軍令固如是乎是足以格虜矣

籌定赴援兵馬

先時北虜入犯邊軍猝不能支必待徵調援兵馬  
馳步奔馳延時日兵甫集而已退緩急無賴乃會  
議總督譚公具題覆准查照近議事理修守哨探  
俱責之該路將領往來監督俱責之該道兵備其  
薊鎮總理則督帥薊之九路昌鎮鎮守則督帥昌  
之三路而互相爲援以共保無虞其總薊昌十二  
路隨軍督應者則巡撫之責也其提綱絜領居中  
調度者則總督之責也務各殫忠宣力共保萬全  
毋得仍拘信地自分彼此如遇警報在燕石三路

則三屯營標兵首先赴援次之遵化次之密雲次之昌平如在馬太三路則遵化營標兵首先赴援次之三屯營次之密雲次之昌平如古北黃花鎮有警亦各以是爲差

三月陞右都督

福建巡按王宗載勘覆嘉靖四十四年南澳搗吳平巢穴功次部覆進右都督賚銀三十兩紵絲二表裏

新立石於堂署與盟爲常對君有述

今上二年余奉召入尋出典三鎮以上言邊事徙

薊門越春仲泣幕府壯哉署也乃取率忠名堂示  
將士報國之誼而名退居則取止止以自警云比  
奉諸使君之碩畫建樓櫓浚隍塹於被邊二千里  
皆鑿空而障之當陟降山原之間其石之爲礪爲  
礪爲硯爲崔嵬異狀莫不日與相對第往來靡常  
云爾夫詩之武人於征也其言漸漸之石維其高  
矣山川悠遠維其勞矣余三復之而三嘆焉日者  
乘塞竊見其壯足恃可庶幾以無駭間歸而燕息  
於署守太平路王將軍獻石一甚奇乃修偏壕出  
之於土中者客以爲太平之符故山川出異石於



其所爰敬受之卜公堂後爲之臺以象砥柱獨立  
正其位於中堂在退居則常對之號爲常對君與  
之定交而告之曰夫人多取君以爲號迺余以號  
則君其蒼蒼而澤有君子之容乎其洞洞而亮有  
君子之衷乎其委委而質有君子之質乎其秩秩  
而曲有君子之交乎或德之爲君子而周旋之如  
一乎敢請吾子而堅以盟石卒然人立而言唯唯  
否否吾姓氏在中國多聞人自磻之忠著於春秋  
檀弓有所子稱孝至漢史萬石君奮亦忠孝世其  
家五代間尙有敢當善戰其他不一二數率後吾

而先往獨吾久伏荒裔別族而居其名曰堅字之  
有垣不與時詭不爲勢趨可仆不可使屈可毀不  
可使柔與土俱安曷求於世君侯獨致之幕下爲  
重客就以旦夕雨雪亦臨霑以杯斚枕席或親爰  
並璞玉奚啻兼金敍之咏之弗字弗名而寵嘉至  
此亦極矣嗟夫止止且安知來者如今不轉而辱  
在泥塗乎吾之遇此亦偶然爾敢猥於君侯執久  
要之盟余甚愕之以召大人大人之占維石能言  
晉之師曠雖謂不然嗣而圯上老人憑焉子房受  
其書而爲帝者師將從其游不得得黃石而嚴祀

之亦神矣今石言豈偶然哉易介於石不終日貞  
吉君侯其亟圖之余避席曰噫大人過矣子房之  
明哲豈疆場之臣所能乎余非石人常戰陳蒙矢  
石必殉之以忠孝是心之不可轉也久矣而身固  
甘轉於危亡塞上異馬革余之職闕下伏斧質余  
之辜唯日兢兢以待命於社稷倘辱泥塗幸甚安  
敢微乎貞吉而與斯石久享太平之福誠不敢要  
其盟敬書之於策

添設三屯右營將領

標兵二營一屬遊擊一屬坐營亦改設叅將領之

議設松棚路將增松棚爲路

其地原屬馬太二路分管因邊長川濶山平梁廣  
地方極衝大虜屢犯於是始設遊擊西割馬蘭之  
羅文一提東割太平之洪山龍井二提特爲一區  
建客兵營房

客兵雜處主兵之中不惟不便且何以見有恤遠  
來之意況二營戰車五百餘輛雨侵日曝久則損  
壞今議每房一間貯車一輛客軍五名而軍有棲  
止之便車無剝損之虞

議築臺規則

相基之法要在內外合一山平牆低坡小勢衝之處則密之高坡陡牆之處則疎之因爲一定之勢但就其灣環遠對之狀各有相宜之勢當必建不可已之處卽不可合丈尺亦當建築不可移之而必就於合式之地又有內山雖不甚高看之似衝而口外橫山遠峙只有鳥道僅通屬夷其餘通馬處所相隔千峰萬障似衝而緩者又有山高萬仞其外梁平雖有牆坡險處而直對大舉正路似緩而衝者於此酌處又難一律也

一定臺基以十二丈頂以十丈爲則二百四五

十人可完一座每年可完臺七十座此其大較也

一臺制尤當隨地置形如牆外地寬則臺當多出如地狹則臺當少出如脊尖削內外俱狹則當稍濶其兩面險其傍以無失周圍十二丈之意則制度如指掌矣

一邊牆多就外險故外下而內高其上當以外面臨虜處計高三丈內面但隨山勢不必拘於三丈其外既險又係低下則臺不必出止就高處起臺不復拘以低處而臺在牆之外況山勢

迂迴自有灣突處是又在相基者有活法耳  
一臺基用石但方石恐難猝得碎石勢必不固  
如石便用石不便則用磚有膠粘好土則以三  
合土爲之各從便求堅但三合土須厚至頂亦  
得二尺乃堅也

一臺下暗門未免稍虛其中而邊匠率愚拙弗  
省恐造不如法反不堅固意者下築實臺門移  
而上外置一梯虜至則抽去其梯似亦穩便然  
臺用跨牆則下層止用實築至第二層則從城  
牆上開門而上卽便矣不必如前式拘定在臺

之中也

議加哨探賞罰

古今名將稱善守邊者不過謹烽火遠斥堠明哨探而已況今薊鎮有牆有坡足以守固惟苦地方寫遠偵探不明若早得真正消息兵馬漸移自成堵截之功其爲尖哨夜不收責亦重且艱矣一向因循賞格不舉以致罰亦不行而人心日以玩愒虜人所損豈止一尖夜之賞哉所謂舍大惜小以牛易羊誠不知其何計也今後守區叅提以遠哨外夷爲第一等墩烽得報爲第二等尖夜哨報失



快卽以軍法從事哨報得實之人每次賞銀一百兩陞二級如致堵截無虞該區將領提調論功外加陞一級如哨探失快致賊卒然臨牆卽有堵截之功該區將領提調論功從減如此庶賞罰明而人心思奮傳報真而分布適宜防守應援皆有賴矣

議收出奇番兵

略云薊虜每犯大舉動輒數萬惟攻其無備出其不意斯伐謀之上策故李靖用兵番而示之漢漢而示之番敵不知其所從又法云兵無選鋒曰北

然豈選於臨時哉蓋選必於預而用出乎奇也今  
練兵已有成式但援兵可用於正可示之漠而奇  
則不能竊見沿邊被虜標掠者甚多往往竊伺間  
有無歸者願在軍前報効者此輩熟知虜情通曉  
夷語若置之標下另爲一伍厚其糧餉無警令出  
哨有事用之劫營奇正相生番漢雜出疑兵之法  
無踰於此

夏六月議山海關改設叅將增山海爲路修牆子嶺  
營城

略云山海東爲遼東之咽喉西爲京輔之藩蔽防

二虜之窺伺通朝貢之往來國初建一衛十所官軍一萬特遣兵部主事駐守誠重鎮也後承平久調軍一千五百於一片石迤西一帶又調二千於遼東大凌河等處止見存操守軍五百而邊長二千里外無可恃之邊內無可守之衆況詰戎禦虜責在武臣而守備官小權輕豈能獨當一面宜改設叅將重其撫治之權量處兵馬充其禦暴之役除見在軍九百與調擺一片石一千四百有奇再募五百有奇合二千之數以五百擺一片石留一千五百在關操備與居庸紫荆三關並重而控制

萬全矣

尋閱邊至石門塞飲胡副戎及劉李二連帥於盟忠樓各截襟爲誓作酬國詩以嘉之

家嚴閱邊至石門時叅將和州李信遼東入衛遊擊崇明劉雲引盃爲誓不負朝廷副總兵旬容胡守仁嘉其義而成之各截襟藏於幕府家嚴壯之遂命其樓曰盟忠復系之以詩云絕頂開高閣雄規壯北門側身見遼海舉首接天關擊楫前賢志裁襟國士恩叮嚀二三子毋負此盟言

創建臺工

是年臺工肇舉人心搖搖咸懷觀望適仲叔柳塘公領沂州兵來戍遂奏罷沂戍留塞上授以臺製戒以忠勤乃先期而完七臺爲諸路之倡人心始定工役子來家嚴親巡課諸路工賞罰有差人以壯麗相高迫臺工並舉之日有播流言於都中者云伐木以損藩籬且工費太侈及考往年修邊牆每丈銀二十兩計一臺之銀百兩止修牆五丈高止一丈五尺僅及一面臺半截之功而省費瞭然況今一臺止百之半耶其木近邊絕無俱百里外取之不知於藩籬何損也

秋八月歃血告文

具官某敬告於司慎司盟之神曰維茲秋仲邊事  
方殷若非萬眾一心鮮克有濟某等僭申詛誓之  
詞凡爾將校或荷國恩或膺世祿或隸尺籍或屬  
檄徵衣食有年報效一旦履斯戒嚴之頃務期協  
猷戮力遠播天威卽瀕於霜露水火必奮勵護持  
共植尺寸以上答朝廷以不負此生則國有崇褒  
神且相之如猶循故轍憚守成規人懷其私心無  
敵愾及傾類忌代騰謗起羞國有常典神且殛之  
告虔於神惟神是質

陳機密吏情

略云薊鎮屬夷比他鎮不同處之得其道直可爲我嚮道哨報能尊中國而安邊徼也近日邊關撫賞太濫深損國威積薪厝火之上惟此一事而隱禍焉夫邊將差失夜出口哨探夷情遠出數百里近亦數十里此必不可已者口外孤身跋涉非夷虜敵明矣將領頭目嚴守邊關必不能隨尖哨出口亦明矣口外尖夜透迤匍伏深山窮谷之間千叢萬林之內虜騎不時豈能逃避萬一被傷非將官智力所能防範近年并將口外尖哨被擄者一

概因他事遷怒悉歸將領而奸猾屬吏聞知此風  
不論應賞與不應賞關口悉恣要索不應卽以捉  
拿尖夜爲名云我拿尖夜殺了教爾就有禍到你  
還得在此阻我不故將官無不曲從之也相沿之  
弊遂被屬吏明白殺我軍馬卽奉有明旨處究裁  
革賞賞者各官恐其捕捉尖夜爲累俱千方百法  
設辭欺朝廷欺上司卽不明賞而暗亦賞之以此  
犬羊之性愈縱邊關賞額日增巧立採柴之名科  
歛軍士月糧以致貧軍逃竄只此一法失中遂生  
無窮之害邊塞空虛全坐於此今該職行邊但見



每處俱稱革賞夷人某處潛伏要行拿尖哨挾賞夫賞謂之挾朝廷之威掃地矣況今建空心臺每日皆出關採辦兵馬有限防備無時顧此疎彼密竟當有失今查得一二起夷人久作逆叛擄殺官軍已蒙革賞多係欽捕之徒近復導虜窺犯見在邊方日伏夜行計欲拿襲採辦空心臺料官軍此徒不振之以威明正典刑終無已時若得一舉之後諸夷振肅敬畏兼行庶可無虞也

議建輜重營



議得師行糧從古今通議樵蘇後爨師不宿飽薊

鎮每遇虜入軍士人騎一馬卽盛甲什物已極力  
難前別無馱載馬騾往往枵腹數日徒具人形莫  
能荷戈焉望作戰如四十二年雖以宜大軍門之  
尊亦不免與士卒同餓山頂視賊出入而不能誰  
何其經過城堡卽有本色草料積貯彼時追賊之  
機毫不容髮數萬之衆若候總入一倉支放亦得  
一二日乃完不知馳騫之虜行百里矣故虜入內  
必變客爲主我軍常以主爲客職此之由也今無  
於密雲遵化建昌設輜重車三營每營一百二十  
輛附以火器用騾一頭養驃軍十名給與軍器題

請欽依叅遊一員統領將各色煤炒乾糧馬料預先發各衙門收貯內料豆各倉口預給無事則收放騾頭操練火器晒曝輜重有事則隨營而進發糧盡則就近而運取遇虜卽依大軍爲勢以車爲營此項須緊急缺乏方用以軍中所必用而不可缺者也

優給延綏衛兵布疋

比以行邊相定新立臺基至太平塞青山口見延綏遊擊張拱立下軍鵠衣露體鬼貌驚人擯石負薪劬勞竭盡枵腹難堪真欲速死爲安不知其生

之樂也推究其故自去年四月赴邊例以二年一代行糧不足奉口且屬兩月未支衣冷無復裝綿寔是一文莫措情苦至極賑恤應先隨卽量將前軍每名處給粗布二疋以爲春衣之助寔曠世之殊恩哀旻之仁政也

議薊鎮急務四事

略云薊鎮急務惟有四事曰建臺曰練戰曰營田曰種樹使其人各一役相濟而不相妨可也但主客邊軍有額數日漸消滅未見增益四事何以並舉然職之專責務之嚴急者惟戰與守夫守固以

築臺爲策而戰必以練兵爲先今若專言戰勢必  
有妨修工如執於築臺勢必不得教練在得每區  
每枝尙有主客援兵今亦俱派臺工合無於內量  
爲抽編行伍逐區容職酌量多寡強弱於有馬之  
內定擬數目每月操一日前容免修工一月之內  
歇工二日只是定編入援見伍者其餘馬步照舊  
做工如此修中有練其定練少爲多視之往年薊  
鎮兵馬遇有虜入未嘗不早應援兵未嘗不集聽  
調度但因平日教練無紀約束未行以致臨時對  
壘風塵昏慘之際不復能辦某枝某營倉卒撲擠

一團爭安避險勢如亂絲所謂雖多亦少蓋坐此  
弊也今定擬自三屯營爲中以東路五區爲一大  
營西路五區爲一大營各配成五方每區爲一色  
給與號令操法發與器械式樣做工之日照前聽  
各區主客將官各將主客援兵一月抽操三次本  
職到處不拘日期調操教練斯戰守有裨寔用矣  
至於栽樹遮虜今以爲奇策不知木多生險難跡  
稀之處牛羊踐踏之所未有易生者矣若沙河石  
岸又用何法栽種見今日外林樹如織未見止卻  
虜馬北方風寒土燥雖有樹木竟是稀疏不比南

方土濕雨多藤木糾纏猿猱莫攀此其一也況惟  
柳榆易栽而山險之地栽難必茂此其二也今日  
又撥軍屯田遠在百里外凡耕種收穫之時正春  
秋兩防之日擺邊修工尙且不足何乃棄營數百  
餘里務農聚兵教戰此惟行之標兵何辭若責之  
區軍大衛者誠難則以盡數派築空心臺每防止  
起二三十座若分一班種田又責一班操練又分  
一班築臺又責一班種木是一歲之間一防之內  
僅可得臺十座猶是石塘古北牆子三路能之蓋  
彼三路牆坡已完關營俱竣得以專力故耳若松

太燕臺石五區邊牆未有者十尙二三灰水粉飾  
一截可頽者連數百里皆然築臺則牆工必廢修  
牆則不能築臺寔爲兩難卽臺工姑約以三年未  
必能畢則邊牆偏坡又當坍塌過半工役相尋尙  
無已時今必欲一面築臺一面種田一面種木一  
面教練四事並舉湏得如此三四項人始可辦之  
恐竭國之力亦有所不能也夫古人屯田謂彼處  
拋荒俱在目前客軍適居其地列屯坐食不如務  
耕人自用力故其法行而軍便之今皆強其勢所  
不便力所不能是以難易分而栽木營田兩者誠



未見其可也

准豁軍下荒田

薊鎮軍士節年以修工撫賞苦累難堪逃竄過半  
田地拋荒司徵收者止以地數徵糧逼累見在軍  
人均爲包賠是以逃者不能復業者有負累難堪  
邊備愈加空虛但逋欠有數所繫猶小無人守邊  
所係最大合無通將荒蕪田地暫爲蠲免其在開  
種者均發各軍分種准令免支軍糧其拋荒地土  
查照題開事例請給牛具子種任其耕種待至三  
年成熟照舊起科庶逃移之軍聞風復業不招而

自集斯行伍充實地方有賴矣

呈叅遵化縣拘軍充商

略云遵化縣開取軍丁商人緣由先爲議行去後業已咨行撫院議禁矣及准撫院手本內開准經通行所屬州縣查照分別不許一概僉派別差但近來邊關之軍爲修守撫賞逃者十已二三僅存六七卽開有家業者不過百金之產是軍之上戶猶不及民之下戶也若寬以緩之緩急之間尙可藉爲城守之用如以重差加之逃亡可以立待及查軍充商人三屯向無此例且奉督撫禁革及面

審各軍提開各縣共三次爲差人詐去各若干兩  
是百金之產又將十去其一而奸胥積役尙爾吞  
噬不已使在營之軍人人自危並無固志今職雖  
奉有選練之命事誠掣肘而難行也伏查原奉總  
理練兵勅諭內開有司抗違聽叅呈處治今該縣  
抗違明旨阻撓練兵合行叅究況各積年吏書皂  
快指騙之匪旣多嚇詐之毒未艾乞照勅諭事理  
叅奏併將害軍吏書差役如律問擬仍通行各該  
州縣以後邊城軍舍餘丁城守修工操練之外不  
許再以別差拘擾庶軍民各安其業逋亡可復而

教練可行矣

上軍政事宜

職自承乏薊鎮數月矣其於人情隱伏行伍習套似若明見肺腑敢不披瀝言之大都自將領以及軍士皆以阿諛奉承爲念只顧眼前再不慮後事如何也嘗聞未戰而廟算勝者得算多也夫所謂廟算勝者非必廟堂之算蓋凡未出軍之前預籌於轅門者皆算也亦嘗聚將士羣坐而籌之曰今日與眾人共計卽是廟算試屈指而籌之虜技以弓矢爲第一我亦弓矢應之弓不如虜勁矢不如

虜利射不如虜近是弓矢之算不如虜也虜近身則以短刀刀長三尺肱長二尺五尺之間可以殺人今我軍弓矢之外近身亦有短刀刀不如虜之利膽不如虜之壯是刀之算不如虜也虜以馬馳逐我亦馬應之虜皆二三其馬俱臆壯而慣習之我軍一馬又皆羸弱是馬之算弗如虜也虜以馬衝我以步應之挑濠則爲自守計非卻虜也若出步戰必不得當羣馬之衝突卽拌命立定則盔甲破碎礮薄不如虜而無可當虜者是地關之算弗如虜也外此惟有火器柰何快鎗之制手執柄後

藥發手前兩手不能持慣氣力拘縮何以命中況鉛子不圓火藥不速卽以一營之軍三千俱爲火器一字列之前行發銃後行不得復舉又恐一放而盡也必須分爲八九班是三千之火器八九班輪之每次僅得三四百而臨時心忙手顫其不如法點滅火門者又數百不過二百餘發響而二百餘內又不過數十命中命中又不能透甲是大隊之虜非快鎗能勝矣快鎗外復有大礮似可當虜聚沖但大礮必防躍退湏去營二三十步而往點艱難又加重滯賦運不多再若分番其勢愈寡是

我在軍之眾不必出陣原野而閉門算計已件件  
遜虜著著輪虜矣況虜眾數萬一心齊力較我渙  
散無紀之眾又何如也若使懵瞶而往僥倖而圖  
此職所不敢也乃再三戒諭兵家之事短不接長  
必須每事長他一分如他有弓矢之利我以何物  
勝其弓矢他有短刀之利我以何物勝其短刀他  
以萬馬衝突我以何物當他衝突務使他件件不  
及我般般短於我如此算定出門臨時慌忙還有  
錯悞而況於安心故套覲憑天幸耶然將士之情  
所以圃阿諛僥倖不思對壘之計而爲算勝之圖

者皆因比來朝廷法令止行於督撫鎮守及與虜  
出入之一二偏裨耳哨將而下以及士卒軍法罔  
及且賊未出邊而錦衣官校已踵其後總兵官或  
陣亡或被逮而督撫亦拏入京其悞事者誰暇以  
退縮軍法治之耶以此人皆玩習爲常又聞往日  
督撫總兵無賊之時明受其阿奉而狃於太平不  
好過求及至臨時自知禍已不遠每每益從寬馭  
冀其用力軍法絕然不行各偏裨以至士卒無事  
之時尙皆謹慎遵奉命令有事之日與對壘之時  
明白欺玩得躲便躲得挨便挨其應對之辭放肆



原之任全言一  
恣縱無復名分甚至剛愎抗傲不用號令自爲一  
夥或以剛惡跋扈或以柔奸媚免有何干繫之足  
畏也此套不能挽回此心不能警換便日日操時  
時練長鎗大棒堅車壯馬徒勞心力徒費帑藏亦  
何益成敗之算哉今職或於言之而不從者面奉  
而背違者稍振之以法示之以威便互相黨聚或  
爲飛語或粘匿帖或布流言或伺上意無所不用  
其心以爲阻撓害成之計嗟乎欲求今日之言信  
令行而使將領軍士一改前項之念必須舊日縱  
賊入牆陷逮原主者查治以法庶幾少懲其大者

更湏疏請於朝明立章程自後有事之日在朝廷  
拿治督撫鎮巡追卹陣亡總叅遊守等官外其標  
部將領中軍千把總等項聽接管督撫鎮巡衙門  
挨次連坐逐項究拿治以軍法如隊長不能用命  
或失事而隊下之軍一體照隊長之罪其自隊長  
而上以至督撫一體皆然如督撫總兵失事被逮  
或陣亡則部下中軍叅遊一體以督撫總兵之罪  
罪之下至士卒一體皆然必期轉移卽有流言計  
阻並不爲其所奪然湏積以歲月而盡其淪浹之  
功庶可收齊一之効也

陳邊情及守操戰車

竊以邊人大都五分類吏五分有京師氣習求其轉移非嚴不克若任真到底久亦自服他日濟事者此也否則無事之時布言感恩有事之際仍襲玩套送上司入朝廷斧鉞中則餘皆束手高談悻悻得計其接任者又復姑息從未把前任誤事偏裨查究以此人人得慣一也夫南兵南將凡有條約上下講讀信而畏之此間將領而下十無一二能辦魯魚復有自己受勅諭不曾記得一字如練兵條約連坐保結節制甚明其戍邊之吏士不識

字者固非得已識字者且効白丁之習二也職又  
細詢邊情皆云某年賊到乃不信哨報之失某年  
賊到乃哨報遲悞之失某年賊到乃一時邊牆無  
人之失又云若有兵到無不阻截成功然皆面言  
欺人多飾妄說凡大賊臨邊幾曾不預得哨探幾  
曾不分布兵馬幾曾兵馬不到地方緣東來山雖  
高聳外面山梁延長高下峻阪林石無碍俱可馳  
馬徑至牆下或外面山梁十餘道而內之縈迴則  
數十里者守兵數垛一人援兵馳集不及卽有一  
二枝到若照守邊之卒疎布則無濟於事必須密

密布之又設疑高處三千一校所分不過數里  
虜騎數萬首尾橫布百數里分投亂攻必有一處  
疎虞此所以千方百計爲守禦而攻無不入者也  
至於戰陣一節詢之舊格凡諸軍教場操習以爲  
觀美之具臨時一毫無用惟挑濠固守者便爲上  
軍良將斷斷然無鬪志也職謂卽今所操便爲戰  
虜寔事彼猶以面前套數應之謂臨陣時不得不  
由他耳又戰車爲萬全之策人人知之矣但彼虜  
傍山沿壑擡營移走非車所及此節終不可免亦  
須爲之再計近造小車一輛樣如原車而輕且便

利也以上三項等情乞亮職言不虛留心區整而邊事庶或有濟也

### 查恤馬軍事宜

各營開稱馬匹每每倒損由於天災者固多而各軍不用心喂養所致者不少勒限買補法有常例況銀兩出於公朋每軍所添補者不過二三兩情非難措但各軍內有極貧者若以一馬之故而使其鬻妻賣子似又非本府與士卒同甘共苦之本心也各該將領先將馬軍逐名審定等第凡有戶丁及領有產業者爲上等每馬倒死除朋銀外

馬少伯上言  
銀五兩買補好馬騎征其家道頗殷而無戶丁與家道稍乏而有戶丁者爲二等於朋銀之外幫銀三兩如家業既無戶丁又少者爲三等朋銀之外量行幫買其有極貧衣食不足朝無夕炊者另行議處各將領宜至公至明體上體下毋得以富爲貧將無作有致乖人情有失本府體悉之意

議覆關院條陳四事

一撫賞得其要則財省而夷情歡悅能爲我用失其道則財費而夷情不悅反爲我敵何則夷情譬如禽獸畏威而不懷德數十年前屬夷未有西虜

之時聽我指揮故撫賞旣省驅之所向無不如意  
卽定期以行賞可也分關以伺賞亦可也自與西  
虜結親之後屢導入犯在我兵威日鈍未能挫虜  
在彼奸心日熾陽順陰逆夫所以陽順者利吾撫  
賞之物謂有西虜而勢不得不留屬夷以爲轉運  
之謀也名雖順於我寔則叛於我名雖離於西虜  
而寔則降於西虜又兼近來將領務增額賞以各  
顧自己地方無事卽拿人隣境若罔聞知此皆弊  
源也今欲撫賞必如所議國威必申無阻須當行  
之有漸合無先練強兵或虜至攻牆戰退一二次



使不得入或於口外決戰或入犯大戰一次必我  
得全勝北虜胆奪屬夷失帖然後任我撫賞無有  
不利矣必不得已先於喜峰口定擬地方分派各  
關置立信牌於進貢之日分給各夷收存凡到各  
日照牌驗賞收牌存驗此亦一策先後時日似難  
概拘湏是將官親自臨賞督府總兵揚兵要地此  
已見行無容復議

一墩臺薊鎮雖以守爲上策而內地之守制虜之  
策清野之法築堡爲第一義也況各邊俱收築臺  
之効但愚民不能明炳幾先惟待禍至而始爲之

防則已晚矣平時一金之惜至與命爲伍誰肯合  
渙散不一之心而損貲以爲預全之謀耶且磚石  
工匠所費不貲惟有三合土一築功省而易成速  
完而持久所當急圖第係內地迺有司民社之責  
本院各道之任一切經理措置事宜難以出位妄  
答

一貢夷侵暴緣乏兵監其護送人員因而得以唆  
使爲患合無出京之日卽令京營撥兵一枝沿途  
列爲左右翼擡營而行張旗鳴鼓使屬夷車輛不  
先不後行於其中每至宿歇之處將官駐劄近門

外地方分馬兵一枝護其四圍沿街列隊如有沿途買賣聽通使人役領於將官處給票掛號事畢回銷大夥作踐衙門則治監押官之罪送至通州通州務要整搦好兵一枝盛甲鮮明照京兵出行例送至三河密雲標兵一枝照例迎自三河送至石門驛遼化標兵一枝照例迎自石門送至三屯三屯標兵一枝送至喜峰口其係往遼東一路亦應議兵一體照前護送遼東應亦一體照例舉行再照夷性本如犬羊未能恪守成諾近來驛遞應付迥不如禮有司亦不稽查視此爲末務甚失遠

人之心以故始有繹騷之變合無嚴飭有司每於  
夷人將至三日前親詣驛遞整點夫馬照管床席  
稽查廩餼務要豐潔務足原擬數目必有賓至如  
歸氣象不可靠之驛遞官吏若有廩餼不備散卧  
無所亦聽護押將官指名奏報合于上司當該官  
吏量示以罰

一入衛官軍調取初意本爲馳突郊野衝鋒破敵  
之用往年餉待旣優而士馬亦自精銳但因薊鎮  
山牆險阻虜入有時而列障乘塞以守爲策遂將  
入衛官兵一體派堞後因創議不修之修又一體

派工因循之後勞苦日增敵愾日少責成之例不及彼中充數之遺遂延戍士若能保得年年虜必不入只是牆上拒禦無馬可也卽使禦於牆下必設援兵凡賊聚攻勢厚之處必要著甲馳援外川截直內山縈隔非騎不前亦難廢馬況入衛之兵本係戰卒西北虜野以馬爲尙萬一守之不固虜入中原必須隨賊向往向往之時必用盛甲而盛甲在身難以步涉必用騎乘雖臨陣各下馬地鬪而風雨之勢倏忽追逐趨利設伏著甲徒趨必無此理今當急將入衛者量免修工揀選操練以爲

戰禦寔用庶致有用軍馬免爲無用損傷是其策耳

覆部議入衛兵馬

議調取邊兵入衛初因薊兵少習虜情邊兵慣經戰陣欲資爲原野交鋒之用也然薊兵之所以少習虜情者蓋以薊鎮山障牆坡有險可據重在於守虜非三四年間東西合勢不得輒入爲其見敵者少也邊兵所以慣經戰陣者蓋以各邊平原易犯零虜常入爲其經戰者多也緣自調取入衛以來邊兵久不見賊遂亦因而懈弛乃致彼鎮行伍

稱爲煎銷而視此鎮邊防若爲故事耳今欲入衛  
兵馬每營量減一千或五百選摘土兵補入邊兵  
同練似矣但所以必用邊兵者爲夾持於對壘之  
時教練於臨敵之秋邊兵之所以難減者一也又  
況薊昌一鎮邊情以守爲先守而不支然後求戰  
邊牆逶迤一千四百餘里計地料人雖逾二三十  
萬亦且不足而我守堦則勢分虜聚攻則勢重數  
里之間又須牆下分設馳援兵馬隨警策應今併  
主客合守每每猶稱單弱若擬減兵則邊牆堦口  
數目不能縮少是減一名必得一名補缺此邊兵

之所以難減者二也但陝西入衛官兵道路旣遠  
更代復頻該班者甫來而踐更者又當遣發彼處  
懸邊孤塞兵力有限均爲朝廷地方所謂無尺寸  
之膚不愛宜無尺寸之膚不養合無以二年爲期  
仍以五枝分番但每枝減去五百行彼督撫鎮守  
須知減去兵數無非體恤彼中之難亦以見薊鎮  
求精不求多之意以後遣兵入衛務選慣戰壯軍  
驍健好馬精利器械驍勇將領到薊之後如有成  
功一體論賞若果不堪怯於戰鬪部來將領從重  
處治關發衙門一體論及庶痛痒相關俾得寔用



及照土兵以漸而練一節職等叨受地方重寄敢  
不殫力極慮而歲仰藉於人豈無厚顏於己但補  
練之事經今一十餘年而又專責憲臣協力督撫  
其期不可謂不久其責不可謂不嚴其任事者不  
可謂不得其人夫賢才之選至督撫極矣任法之  
嚴至憲臺極矣寬假之恩至十年極矣而尙未得  
効者寔薊鎮無人可補無中肯綮之練也況今督  
撫受任未及年餘本職領方閱月輒謂額缺補充  
教練成效誠不能一捫九仞而反十年不可醫之  
疾也爲今之計第一當急求精兵數萬培植京師

根本之地次及薊昌次及各邊次及腹裏但僉派民壯方今民窮財盡應命艱難若抽選見役之徒則府州縣城池國初賴於軍衛以制禦者今皆無足恃而獨特於此且有司又用之爲送迎之藉其牢不可破而素無厚養豈能成邊合無通行兩直隸河南浙江湖廣江西山陝等處軍衛有司比照貢士之法而以巡按總其事酌量州縣大小里戶多寡選舉驍勇之士年二十以上四十以下相貌雄偉力舉三百斤以上者州縣大者歲選五名州縣小者歲選三名每衛內有五所以外者選二名

五所以內者選一名分別地理遠近起送赴京名爲貢義士每年不拘地里遠近俱限五月中到部本部預鑄三百斤鐵人一箇令其肩負往來行一里爲合式夫貢選勇士專於力者緣武藝器技之習歲月可能一教習之勞耳至於膽力天賦非人力可成者既有大力以爲之本再習精諸技一可常十選中送隸戎政衙門擇一善練謀勇戰將統之以七月爲始發於薊鎮標下編伍教練兼以防邊不許分調零散擺邊做工十二月送回京師大營隨操休息至次年七月亦如之但千里之足旣

至而撫贍不可不厚名色旣殊他軍自難比例以一田夫而蒙此優養自然比之卒伍愈當竭力報主其給糧之則每名每月家小在京倉支糧一石本身日給工食銀一錢各騎戰馬京邊支草料軍火器械卽於自工食內聽練兵將官發式自造使用各役名爲義兵不作軍數是養之旣厚論之旣明則人自肯來民又不擾通一歲計可得三千有零十年可得三萬有零旣天下驍健之選如得名將教以實練真正法眼不爲虛套所誤申明嚴令必信必行是三萬之義旅卽可當十萬之邊軍以

咸少保年譜

卷八

後日積月累合天下之力以實京師以強根本莅中國而撫四夷無有不克者矣如慮錢糧過多處辦不給見今京軍逃亡者不知其幾當將開銷過錢糧總積在倉併國初原額三十二萬見今所缺錢糧務要一體解足存貯倉內如此則京師之軍見在九萬名一查之間一年之內可減二三萬足養若干三十二萬原額之內除去見操九萬尙有十數萬清出一半所得工食可養若干及查東南如福建浙江江西南直隸等省各衛所原額官軍十不存三而額徵倉糧足支之外尙餘半倍合無

於內查照額數缺軍米石照數解京不下數十萬  
又可養若干以三萬爲率則清查舊糧逋額便足  
供之何慮錢糧之不給哉夫京師有此三萬再加  
額軍四五萬務不減十萬之數則戰必勝守必固  
內順治外威嚴植本固而發源深億萬年靈長之  
祚此其一助矣

九月奏請申令以一士心疏

近於秋防戒嚴之月節據喜峰等哨夜報稱東西  
二虜合謀徑犯薊鎮東虜土蠻會同北邊從無看  
見邊牆的生夷剗灤等都調到正北地名打卜酥

卽是鹽廠地方土蠻住牧處所聚兵俱齊西虜安  
灘黃把諸酋聚兵亦齊見今起身東行內東虜犯  
喜峰口迤東太平燕臺石門等路西虜各又分爲  
三大枝分犯古北曹牆馬蘭等路旦夕有事除臣  
嚴爲分布固守及秣馬待戰外看得薊鎮自庚戌  
以來止是一路入犯以全鎮之力調集二三路之  
間幸曾守固一二次今報東西並犯已分道矣而  
西虜之中分而又分緣其部落眾多雖分亦有餘  
力在我兵力有限無所不備勢分力寡仰仗皇威  
十一路之中兵賊相值攻守兼備必期堵回寔爲

不戰而屈人兵策之上也但邊長力薄萬一致有一處潰牆而入則十路皆棄全功當以血戰爲主查得先該軍門議立條約責臣行各統領援兵將領偏裨自上而下各取保結並無臨陣退縮不堪之人固已教之首尾聯屬之義近又復行自下而上歆血誓神每兵九名保一隊總隊總三名保本旗總旗總三名保本百總百總三名保本把總把總二員保本千總中軍千總中軍保本將領將領保臣臣保督撫兵備若有失陣者各甘抵命是又責以親上死長之道此節節而制之之術卽血戰



之法也然血戰之勢在虔虜形彼旣數十萬衆我軍最少亦須數萬方可對壘今查全鎮擬定王客標路戰兵馬步不下五六萬此之虜勢衆寡雖有不同氣勢足充一陣但以寡禦衆之道須聯數萬人之心爲一心合數萬人之力爲一體則勢齊力倍勇氣自增所謂撼山易撼岳家軍難之機也第恐號令之傳宣雖一新於耳目而沈痼之積染未痛改於身心往日薊鎮之弊其叅遊之視督撫總兵與中軍千把總之視叅遊軍士之視中軍千把總平日禮文尙有可觀一至臨壘之時將領並不

聽受主將約束雖督撫亦不之畏矣其心以爲虜  
旣潰入旣已破矣彼爲主將者非遭鋒鏑之殘卽  
有桎梏之逮泄泄然伺虜之出望望然知將之去  
終不能柰我何也且失事者以已斧鉞在前不暇  
督人之過卽鳴之縲紲之中誰復爲地方之計而  
繼厥任者始固昧於不知其詳中則諉之不切於  
已終則責之報効於後不惟不加之罪而且復施  
之恩至有債事於此而允其報効於彼朝以失陷  
主將而暮由保薦拜官甚至一陣之間有日擊主  
將之喪亡而不救身猶冒功以陞擢者人亦何苦

而必與主將同死卽此一陣之間萬人爲心如何能破虜成功以伸皇上之天威哉臣因痛偏裨士卒之未必同心誓死決戰故敢颺言於未死之前以爲求死報不如功報之爲愈也竊計虜犯之時臣必首率饒健登牆拒敵賊若先以步虜乘險而登臣當其騎牆欲潰之際卽督南兵殺手數千名仰而攻之決期堵回但恐不在臣駐之左右而遠隔數十里之外步兵馳救不及賊必大入臣卽一面以部士抵當一面調集各路援兵及請督撫各標兵或堵之於所犯之途或邀之於情歸之際酌

量機宜誓決一戰務必大挫虜鋒使之狼顧奔北  
雖不能救東隅之失亦可收桑榆之功所可慮者  
兵機變於呼吸之間人心動於死生之路臣雖一  
人當先不過一人之力所殺幾何必臣倡之大小  
將領從而和之同心協力一鼓而前庶可成血戰  
之功然必仰藉皇上威靈叮嚀諄示庶幾人心齊  
一今於決戰之時敢有偷生之徒違臣號令者除  
頭目以下欽遵近例都許以軍法行事其叅遊而  
上恐臨時無暇行法容臣卽時鄉送軍門照武官  
都指揮例當陣以軍法示眾至若眾將棄臣奔北

臣果力戰殞身均乞皇上渙頒明旨必賞之法典  
既不使巧詞漏網亦不使倖計夤求若諸將爭先  
奮殺不退臣有死傷亦不相累至於失陷將領之  
中軍千總失陷中軍千總之把總百總失陷把總  
百總之旗隊總失陷旗隊總之兵士亦聽撫按一  
體查明處以死刑毋使苟免臣雖一死而後之士  
卒皆知法無所逃將領得藉偏裨之力偏裨得藉  
士卒之力未必不由於此也或議數萬之眾難以  
加罪殊不知所罪者乃首先奔北失陷頭目本部  
曲凡下一等之人譬如失一叅遊所誅不過中軍

千總三四人耳以下則勿問矣失一千總所誅不過把總二人以下則勿問矣失一把總所誅不過百總三人以下則勿問矣失一百總所誅不過旗總三人以下則勿問矣失一旗總所誅不過隊總三人以下則勿問矣失一隊總所誅不過步兵九人其他則勿問矣究竟不過誅數十人而止若果我兵全勝虜衆大敗勿問陣亡何項將領不係奔北失陷者皆不連坐如此則血脈貫通氣勢聯絡法未嘗不約而畏法者衆罪不必加衆而及之者均雖欲不一心自不敢也所謂誅一人而千萬人

懼者此耳臣復慮首功所斬有數前進原非一軍  
奔北亦非一騎退卻不止矢陷頭目之輩尤當別  
立一法以輔勸懲之所不逮合無將用命之士齊  
心向前果有首功者照例紀錄其附和之眾當以  
加糧爲賞逐次漸加使之終身得支以爲眾望設  
或逡巡畏縮望風潰亂者亦當概減其糧以示懲  
戒以其所減益於所加必待再有功勞方准議復  
如此則人心齊肅賞罰昭明我兵雖少亦可成一  
戰之功以寡敵衆之計無出於此者矣伏乞勅下  
兵部再加詳議特賜施行則人心可一國法益彰

愚臣誓死之志或可少盡而籌邊之策未必無小補也再照兵機必以耳目分明爲先薊鎮耳目不明奸猾得計此不用命之要領也往日各該大小將領但遇虜勢臨邊先行分布心腹人役入京臨時亂行差人徑報閣部甚至布滿密要虛傳功伐忌害阻陷駕非攘勞無所不至夫其人專一用心於此又肯臨時用命哉爲今之計伏乞勅下兵部一行督撫臣等今後叅遊守提等官凡遇大小事情止許差人飛報督撫按道鎮協衙門酌量事體輕重緩急或通行提備或轉報部科一行五城兵



馬司但有參遊以下布設腹心於京都內外者出示地方報官拏問其濫報違禁者許兵部就行解發軍門兼其將領拏究至於臣雖一鎮統兵主將但獲功則當不伐有罪則當順受凡涉功罪之際亦只徑報督撫巡按轉奏亦不敢肆行濫報至於將領生奸誤事者容臣徑奏或徑以軍法處治庶功罪之核不眩於耳目而弊絕心齊自圖寔效矣

陳主將機宜

近於沿邊新築敵臺遠望之則巍然雲表足以壯觀登覽之則鞏固高濶足以壯志內地軍民恃以

爲固有警之秋咸願棄城奔臺以爲命如寬佃處  
處父老告乞先及可以觀人情矣每到一臺踰據  
得勢築造通完可收不戰之全功但臺勢濶大工  
役非輕惟恐人力不繼卽繼而難久此所當爲調  
停務使人忘其勞久勞不怨五六年內厥績成矣  
至若戰守機括職近始得其情真有可憂而可惜  
者大端數百年來自將士以至士卒外而軍舍內  
及婦女惟知有巡按之威次方知有部院次則有  
司再次則撫院兵道絕不知有主將且主將威令  
久不行卽欲行而勢有所不能不知一報警到馳

牆拒堵臨時運變此時抑責之主將乎抑責之運  
籌調度之各有司乎陳兵原野機會斯須指揮三  
軍欲萬人同心有進無退抑主將之責乎抑巡按  
之責乎夫平日主將如無事人而其一切威令賞  
罰咸歸於當路之文臣分局於有司之專奪一旦  
臨事責望平日不知有之主將俾使心齊力一用  
命無二是豈一朝夕之能致哉此今日邊方之要  
務也乃今軍營制矣標兵增矣諸路援兵選而練  
矣敵臺築而成矣前項機括若不少轉則凡一切  
苦心皆當置之徒勞之地伏望曲賜留神但得少

轉一分必有一分之効矣

會學院作興三屯武學

三屯乃總鎮駐劄用武之方所部官軍皆係薊州永平山海等十七衛所調集之人父子相繼數輩生齒日繁人材漸盛各有應襲及俊秀子弟資質可教趨進無門既有原修學舍見存又有先年教訓事例及查得貢院教條內一款應襲武生年十五以上准照例請詳送學作養務使有舅知方養成將材以爲國家異日之用隨出示召集在營各官下應襲併軍舍下子弟試得貢堯勤等一十六

名內有精於射藝者吳大文等一十二名藝射閑  
習俱堪作養令行請將考中各生允發該學肄業  
俾知尊君親上之義禮樂度數之節務期化愚爲  
賢候歲考與開科時一體起送考試擬合請會

建祠以崇忠義

薊門全鎮之地通屬燕趙之分野古稱慷慨悲歌  
素有激烈之風者夫歲月雖有古今而性善本無  
二致卽今王客官軍一十五萬十數年來委靡不  
振全無敵愾徒費餼養固雖習俗頹弱未可一變  
至道寔由振作無方鼓激未盡其術耳本職竊聞

千金市駿骨則千里馬至恤死以勸生則輕生重義之豪傑自爾嚮慕景從矣表揚陣亡謂非練心作氣之要術哉查得薊鎮地方東西延袤二十餘里扣關屬夷爲變巨測大舉之虜聚犯有時屢年鋒鏑陣亡將士莫非爲國捐軀中間卽有一二敗卹亦必係乎前列至於義不屈節罵賊而死者尤多夫何至今並無祠宇追祀在職官陣亡者尙有已未陞卹之殊在軍民兵士陣亡者不惟未曾血食抑且未卹其家查得國典能爲地方捍災禦患者祀之致身王事者祀之此輩正與例合所有亡

戚少保年譜

卷八

過將士合行各路查照各地方陣亡官軍每路總  
爲一祠各立本區營城之內每祠量給看守軍二  
名查撥荒閑地土百畝每年分其禾稼以爲春秋  
祭祀朝夕香火之費以後遇有血戰陣亡忠義之  
士一體附主入祀永不再用區處每月朔望該路  
叅遊中軍大小等官行香於祠每歲春秋該路叅  
遊主祭其立祠工料俱令各路叅將督各標軍從  
便採取於該處並不干擾有司如此庶人心知勸  
而氣機一鼓敵愾在茲矣

免哨探入役柴木

夫用兵之道當先謀虜之情惟有走虜尖哨此輩  
平日本當優厚餼養有事之日哨報不寔軍法重  
處惟其養之既厚故其法之必嚴且一路不過十  
數人做工採木豈少此十數人之力哉近各路走  
虜尖夜一概計日採木責取價銀非所以厚勸養  
而專責成也各該路將領等官務將平日走虜哨  
探得力人役盡免工採之勞卽令此輩平日十分  
便宜受用如一報之寔所濟何啻數萬金鎰之利  
數萬兵力之貲此用兵當以謀虜爲先也其尖哨  
應免柴木宜遵所論不得仍襲前轍



定隨車營兵馬

略云前議將標兵四營一屯古北一屯曹家一駐石塘一駐石匣而車營步軍亦算數分布以爲一路之防無非周備之慮也但馬兵掣于車營必難自固臨時須先擇總路一城以車圍在城下城恃車之火器車恃城之藩籬互相保守無虞方待馬兵趨赴車中惟有隨車鳥銃可發牆上其佛郎機斷不可以離車萬不得已必留一架隨車軍兵必每車留數名車正等役須留車中若盡將車軍掣邊其車須入一城內倘虜馬潰城入犯先保車乘

無虞馬兵方有歸著斯勝算也

上政府禦虜五策

薊鎮雖列九邊之數其虜情軍情守勢戰勢種種不同今虜西犯則古北牆子嶺馬蘭谷皆其必攻必由者言古北則曹家寨一路在其中言馬蘭則松棚一路在其中二路從曹馬分出計其最要者五路惟石塘一路稍緩東犯臺頭燕河太平東半石門西半皆當其衝而石門之東太平之西雖稍次於燕臺亦非不戒嚴之地計其最要者四路是全鎮長短十一路間無所不當備矣若必欲無所

不備量地計軍三分之一衝處尙須一垛五六軍  
更急處十餘軍其內地撥馬隨警援兵守關寨城  
池與老弱幼小不及計也惟聚犯則守兵勢厚分  
犯則路路可以聚攻今乃酌量緩急分別衝僻不  
應守者或只存瞭望之役所常備者乃聚全標之  
師軍門督一副二標專分西四路本職督二標專  
分中三路撫院一副二標專分東三路而隨時緩  
急又不論信地相機奔馳以應之連標兵援兵主  
客每路僅萬人耳而牆子嶺尙少援兵一枝松棚  
尙少勁兵一枝太平尙少協兵一枝石門寨尙少

勁兵一枝山海關路險固責以自守通計選得勁兵五枝庶乎無所不備無所不密矣然議減罷者尙未停筆今惟計虜若東行已深勢必難復西向聽軍門調昌鎮守邊客兵就近互移以補東方之缺而已賊如合夥或東或西專攻一二路聞報調湊軍馬以併力職等保爲守固必收乎全國之效若東則極東西則極西二路分犯而西虜勢衆於一路之內又分攻古曹牆馬松之間勢必不能萬全萬有一處疎虞不惟兵馬勢分職等亦策應有限也豈能分身處處有一督撫總兵乎於此若堵

得一路回職集全鎖之兵堂堂一戰卽收奇功未  
可預料但恐二處俱入則兵馬爲所分隔須各照  
地方分應勢孤力寡是所可憂姑以兵馬得聚及  
預算數著而籌之其未入也設機於要路持以疑  
之卽不能皆中彼可疑而退或因搜山探路遲遲  
及牆我可調度援兵一也牆臺之上竭力守禦二  
也卽有數百先登之賊可以南兵仰戰逐出之只  
恐不得遇不慮不得勝三也萬一潰入調集重兵  
以車營追截決一大戰或可擊逐使傷使亂而首  
功難多馬兵未可輕縱以後相機出奇皆難預擬

四也及其情歸沿邊布諸路步卒於險職等棄車  
在後各將馬兵每將官爲一股職當其中堅一二  
十股各拌一死一齊砍殺務獲奇功以舒數年神  
人之憤卽有矢石之危盡吾致身之分如功不滿  
志俟其出口職等親帶精兵乘懈夜出追砍其營  
必獲功如願而後返否則決不生還以負明時衆  
養五也此五者皆守戰之策乃若分布不足一節  
非職預爲已地非誘之兵少亦非敢分咎於減兵  
但爲邊方大計欲望臺下知邊事真情真狀免爲  
紛沓不一之議搖惑於胷中耳

議喜峰口守備改參遊職銜增喜峰口爲路

薊鎮原有屬夷近雖情多外附其我邊防所賴亦得失相半利害相兼緊要之地全在喜峰撫賞一關凡諸路尖夜被夷阻執必爲之解紛凡諸路屬夷挾索生事必爲之禁諭甚至諸夷奉貢出入爭奪仇殺亦爲之處斷至於諸夷境外不睦之事討賞之時亦多質訟於喜峰而聽其調和若典守得人則諸路無執擄尖夜之害無撫賞失事之禍而東西寇虜入犯之消息向往之真情無不預知以便防禦是該關之所繫何如其重也故舊例每年

入貢之期撫鎮會同親臨撫賞且兼設有鴻臚寺  
官二員譯審夷語但查得該關屬夷除入貢之外  
其廳前賞賜赴討無期未有五日無夷扣關每起  
必須數日方得遣發出境而撫鎮地方廣濶時當  
巡歷諸邊不能株守喜峰一口雖本路有叅將其  
駐紮適中之地又相隔喜峰九十餘里四提調之  
之修守教練亦不得專爲砲繫而前項事宜不得  
不聽專制於守備緣討賞之夷率多都督等員固  
羈縻犬羊之職未可以中華之體統論而奸宄亦  
每執此以與守備請禮爭衡誠非所以尊中國而



攘夷狄之計也合無將該口守備量加叅遊職銜  
仍兼理夷情名色以重其事如果夷情帖服計以  
年勞遠近逐次加銜雖至副總都督再不陞調別  
地其所管地方以木關爲中西至灤河團亭寨八  
里東將董家口提調屬之至青山口關爲界五十  
里庶中國有常尊之勢而外夷無不得之情邊方  
有先事之備而地方無意外之慮矣

附錄八 關述

先是應召自閩帥銜選鋒而北爲忌者置厰京營  
尋出爲總理節制四鎮練四主將兵以上疏言邊

政復移鎮薊門因憶入關以來感而賦云少小好  
紙筆長事行間役落落慙父書爲國空馳驅三吳  
早分閫一麾豈憚遠兩越五六秋水犀雄貌貅南  
征復七載鯨波息閩海百粵虜轉深誰憐和氏心  
千金幾垂罄松菊荒三徑紫泥儼回轡萬里重入  
關稽顙玉墀側回頭驚澤國已分老樓船竭來忽  
朝天古來忠與義自可居蠻狄何當聖主恩傳以  
羽林軍有懷未及吐出振漁陽旅詎意流涕餘翻  
同長沙居嗟哉漁陽鎮邊愁不可問度其塞上行  
何處古長城偶逢路旁女泣下前致語阿郎戍邊

睡何來輕薄兒莫展合歡席置妾章臺陌郎憂未  
能紓妾憂殊難祛踟躕日揮淚王孫數停騎呼酒  
意翩翩誰不窺娟嬋但謂青樓下安有羅敷者力  
竭計方窮匕首飛白虹將以謝大紀未忍先郎死  
赤膽猶斗懸寸心亦金堅相期在白首郎能知妾  
否行行薊門東雲沙迷晴空寒衣欲前挈北向更  
嗚咽不怨夫婿未封侯願持婦德如金甌聽罷拂  
鬚三太息方信紅顏氣英特

設備附臺軍營

沿邊修建敵臺卽爲扼守官軍之家當使之臨敵

不走見今敵臺修建未多紛紛報警有敵臺處卽  
爲有家可據但敵臺止可安人無處牧馬將馬散  
在牆下亦非良策其各該客兵將領須將各擺守  
官軍照各分信地相去四五十步卽共劄一營以  
爲家有敵臺去處卽就臺爲營敵臺內一面仍用  
亂石疊砌五六尺高小牆十餘丈如月城樣以便  
安馬無敵臺處卽據舊臺或護牆臺劄一營以爲  
家墩下內面亦以石疊成牆無舊墩臺處卽據牆  
上以山險爲之但周圍俱要疊成院牆或以木柵  
圈轉亦可遇警之時照舊擺列信地奮勇拒堵至

十分危急或賊從他處潰入卽將各軍收入臺墩之內併力截禦並不得似往年見賊輒走但有一人潰散本管千百旗總許登時將本軍斬首示衆故縱者同罪其牆內之寬窄則視兵之多少爲之如此則我常立於不敗之地決無不可固守之理其各該標兵援兵一體各就臺就墩就險各下一老營以爲家有行營牌者卽用牌劄無行營牌者亦用石疊各先將馬匹收在老營之內一遇事勢緊急擺牆之兵皆歸老營據營以守標兵又將重車並列一營在總括路口輕車移就邊上適中去

處割下一營或二營聽候聚兵決戰虜卽入邊當其初入見我兵在營不動又有車營在彼決不敢放手折牆我兵聚齊與戰決可驅之退走萬一不然亦收入大車與之大決一戰定不許深入內地各該在邊將官務要先時料理各該標兵亦要先期計定免至臨時愴惶悞事

### 議練選保河民兵

保河民兵係奉欽依原選入衛之數人馬頗稱精壯真有燕趙豪傑之風今將二十年法久弊滋其戍邊旣非正身好漢又以隔涉勞苦因而或生事

端卽使逃走雖節行各追提解緣有司偏愛而吏書黃緣爲奸不行管解正身戶丁多以別丁補役動稱正身無獲殊不知集烏合之衆而甘蹈白刃莫敢推諉者緣其身家墳墓維繫於有司之故也今若聽其縱放正身百不獲一而戶丁補解例難加以逃丁之法彼將何所畏憚而不逃又何所顧忌而戍邊耶此類轉相效尤將來莫可究詰旣係屬練戰之兵萬一臨陣畏避逃走悞事責將誰諉趁今兵回之際合無行天津易州二道轉行各該府州縣正官同領兵官通將各兵逐一遴選務查

精壯有身家者充補老弱者退出選編停妥造冊稽考候春防過堂之日驗有不堪者領兵官以軍法重治其不堪民兵分別州縣開報並查某州縣解到正身若干某州縣補解戶丁若干某州縣並無補解通乞定擬分數叅究捕獲正身者緝捕之人照例給賞有司註以賢能獎勵如此庶兵籍有定人心知警而教練可賴也

### 給示哨報賞罰

該鎮各路及本鎮標下設有尖哨夜不收家丁等役專爲出口遠近不等偵哨虜情以便調度但各



役中間有等拚命捨生用計用財探得真情者每  
每無復分別賞勸有等望風捕影虛得謊報警動  
內地勞擾兵馬事後又無分別究治更有等索虜  
之財與虜同心卻將我消息透漏而復不得虜情  
者每每失於查究見今秋防已畢所有本年兩防  
入虜尖哨若不甄別勤惰以示勸懲則奸頑者慣  
習得計日相效尤而勤勞探寔者無以激勵必致  
惰心又該本府見得石塘古北曹家寨專重於西  
虜報東虜不真者量究從輕或免究報西虜不真  
者重治石門臺頭燕河太平專重於東虜報西虜

不真者量究從輕或免究報東虜不真者重治凡  
西報得東虜真情東報得西虜真情者俱破格重  
賞喜峰東西虜報不真者俱重究松柳馬蘭次之  
其報虜聚兵於犯本鎮地方得寔者呈允事例賞  
銀一百兩保奏陞級若報大虜動靜的實而屢報  
得真並無一虛者擬賞從重報賊幾事得實幾事  
成虛者酌量事體輕重重者一事報實輕事報虛  
悉行免究仍量議以賞重事報虛輕事報實仍以  
虛報重治事等者以一實抵一虛贖罪凡探報前  
後皆虛屢次不真者分別輕重處治係本鎮入犯

者軍法從事係犯別地方者減治但各役深入虎穴出九死於一生而偵探虜中動靜使邊備視以爲緩急調度或方工作之時得一報而置守或方戒嚴之際得一報而興工所賴不淺均爲有濟似難有罰無賞其有功哨夜併該管夜不收官一體以哨夜功罪分行賞罰今仰本官將開去應賞尖夜姓名併見今發來銀兩照等犒賞取具結狀繳報如有事故差遣等項照名扣回不許冒領仍將應賞哨夜姓名併賞過數目與夫應罰尖夜花名及發落過緣由出給告示通行曉諭知悉

潘家口造船事宜

勘得灤河之水北接大[甯]爲東虜聚兵之處而潘家口外河岸寬長沙堤廣濶尤爲虜騎可容之區嘉靖三十八年曾此入犯但河東之水深淺不同而潘家口設關之處水勢奔騰波濤洶湧船隻之設尤當酌慮且河寬三十餘丈必非十船所能擺列又非百人所能擺守本官卽便會同喜峰口守備都司楊秉中松棚谷遊擊張拱立親詣該口相度地理酌量水勢沙寬之處從何爲之設備水急之區將何爲之防閑如果然可堵截不必以惜費

爲疑若使船不堪守亦不許自以爲是必須虛心斟酌從長計處務使一勞永逸計可萬全斯不負所托也其長城口等處應否內外創修有無堪以備禦亦一體議處停妥具詳裁奪

清關寨熟夷

先是虜數跳梁當事者爲羈縻之術各關寨皆令熟夷住牧晝夜俱在腹裏衣食挨門供送夷乃遊視內地虛實竊捕人畜向別關貨贖不遂意卽殺之日甚一日邊人多不自保家嚴俱逐併大關口外每路止一二處撫賞米銀段布酒肉等物用升

斗秤尺較過如額不許多給夷有匪茹者勒兵出塞追剿本會斷其額賞不逮餘類本會窘迫播通既而叩關悔罪縛獻元惡以抵竊犯之罪伏刀畝盟而後已焉

### 議貢馬

略云朶顏等衛每貢馬三百匹選六十四匹解京餘給沿邊軍士騎操邇來夷人狡猾所貢皆疋羸殘弱有未入關而死者有甫入而死者不惟無益於軍且有賠椿之累將領有倒死數多恐罰及勒令軍人買補因而逃竄縊死無所伸訴合無將給軍

之馬驗其臚壯堪用給軍其不堪者發附近有司  
變賣銀兩充買馬之用則貧軍不致負累邊備免  
於虧損矣

### 議併關寨

略云各路關寨營堡遠者不過十餘里近止五七  
里每堡多止百餘家少者二三十家殘村破壁滿  
目淒涼今各路旣設守提官各營復有營墩管操  
官乃每處不間遠近衝緩悉設一官此輩多貧寒  
末秩惟恣剝削十羊九牧軍逃糧耗多由於此合  
查衝緩遠近或一二處一官或三四處一官其官

嚴加考察年力精壯志向頗端者留之貪懦無能者汰之其一應修守事務將領責之提調提調責之關營體統相維分務自舉何用多官爲也

登石門驛新城望塞有感賦詩以暢其志

萬壑千山到此寬邊城極目自辛酸援枹志在捐身易按塞年來報國難尙有二毛知往事偶聞百舌送秋寒聖朝不欲窮□□疏草空從午夜看

冬十月巡關臺工

看得石塘嶺參將陳勛正關河東一臺石臺可與大水谷成繼美爲亞匹磳壁尤與大水谷爲伯仲



立柱合抱逾三丈之良材複屋兩層成重樓之巧  
製至於臺面亭障則山藻嶙峋丹堊炳熠四軒迴  
遶八窓玲瓏亭若江南之月榭臺爲薊北之天關  
使幽人處之可以談圖秘之奧若羽化而登仙遊  
人至止可以覽山河之勝助豪吟而眺景不但武  
夫乘禦可以攘外而安內也擬上上等庶賞稱其  
勞而人勸於役矣相應特獎以勵諸將

十二月譚公特疏題薦云總理戚某才誠並具文  
武兼資獨以其身係安危之重卽艱難盤錯務成  
其信於先資之言每嚴其辦於義利之關雖禍福

死生不變其塞於生平之守語統馭之規模則治  
眾如寡真多多而益善論綜理之周密則視官猶  
家無事事之不親凡令必三五申具見忠肝義膽  
一檄卽千百語皆爲豹略龍韜訓練足以動鬼神  
夷狄之幾欲一逞者已竟憚其威略忠信可以貫  
金石將士之始而蓄疑者今咸服其精明充其素  
志豈但勒石於燕然竟厥成功直欲標銅於瀚海  
此一臣者真爲國家之良翰而無忝公侯之腹心  
所宜隆其委任假之事權俾得展布以奏奇勲者  
也

附錄

石塘路鸚鵡巖二詩云翠羽丹崖敞碧天飛來風  
雨不知年肯饒寸舌呼餘粒惟有精神倚暮烟側  
身天地欲言難故向空山戢羽翰雨後千林爭起  
色月中片石怯生寒更無金鎖驚春夢似有清音  
落暮灘一自邊城留幻跡隴西雲樹幾凋殘

除夕署中乏薪作詩自慰云試看臘向天涯盡獨  
有邊愁戀二毛列塞雲連青海色雙弧春隱赤魚  
腹晨炊烟斷家謀拙旅病魂銷國事勞西望薊門  
通御氣孤臣不惜敝征袍

戚少保年譜耆編卷之八終

戚少保年譜

卷八

五